

Naalakkersuisut kingusinnerpaamik UKA2017-imi aalisarnermi raajat qaleruaannit kitosanimik tunisassiortumik pisortanit namminersortunillu pigineqartumik imminut akilersinnaasumik pilersitsinissamut toqqammaveqarnerseq misissuinermik saqqummiussinissaannut Inatsisartuni aalajangiiffigisassatut siunnersuut

Inatsisartunut ilaasortaq Peter Olsen, Inuit Ataqatigiit

pillugu

Inuussutissarsiornermut Ataatsimiititaliap

siunnersuutip aappassaaneerneqarneranut

ISUMALIUTISSIISUTAA

Ataatsimiititaliap suliarinninnermini kingullermik ilaasortarai:

Inatsisartunut ilaasortaq Mimi Karlsen, Inuit Ataqatigiit, siulittaasoq
Inatsisartunut ilaasortaq Justus Hansen, Demokraatit, siulittaasup tullia
Inatsisartunut ilaasortaq Vivian Motzfeldt, Siumut
Inatsisartunut ilaasortaq Nikolaj Jeremiassen, Siumut
Inatsisartunut ilaasortaq Kelly Berthelsen, Inuit Ataqatigiit

Ulloq 20. oktober siullermeerinninnerup kingorna ataatsimiititaliap siunnersuut misissorpaa.

Siunnersuutip imarisaa siunertaalu

Suliffeqarfimmik aalisarnermi raajat qaleruaannit kitosanimik tunisassiortumik pisortanit namminersortunillu pigineqartumik imminut akilersinnaasumik pilersitsinissamut tunngavissaqarnerseq pillugu misissuinermik Naalakkersuisut kingusinnerpaamik UKA2017-imi saqqummiusseqqullugit peqquneqarnissaat siunnersuutip kingunerissavaa.

Siunnersuutip Inatsisartuni siullermeerneqarnera

Siunnersuut akuersaartumik tamakkiisuunngitsumillu tapersersorneqarnermi kingorna Inuussutissarsiornermut Ataatsimiititaliamut suliarineqartussanngorlugu innersuunneqarpoq.

Ataatsimiititaliap siunnersuummik suliarinninnera

Siullermeerinninnermi siunnersuummut tapersersuinerit Naalakkersuisut saniatigut politikikkut oqaaseqartartut amerlanerussuteqarluartut oqaatigaat, tamatumani pisortat qanoq annertutigisumik akuutinneqarnissaannut nangaassuteqarneq tapersiinnermi

apeqqutaatinneqarluni.

Siunnersuuteqartup misissuineq ingerlatseqatigeeriaatsimut ataatsimut (pisortat namminersortullu suliffeqarfiutaat) killilermagu ataatsimiititaliamit paasineqarmat ilanngullugu oqaatigineqassaaq, isumaqarlunilu aalisarnermi raajat qaleruaannit kitosanimik tunisassiornermik imminut akilersinnaasumik nunatsinni pilersitsinissamut tunngavissaqarnersoq siunnersuuteqartup paasissallugu pingaarnerutikkaa.

Tassunga atatillugu tamakkiisumik misissuisoqassappat pissutsit attuumassuteqartut tamarmiusut, tassungalu ilanngullugu ingerlatseqatigeeriaatsit assigiinngitsut iluaqutissartaasa ajoqutissartaasalu ilanngunneqarnissaannut naliliiffigineqarnissaannullu Naalackersuisut kiffaangissuseqartinneqartariaqarnerat tunngavissaatinneqartariaqarpoq. Tamatumani kitosanimik tunisassiornermi pillugu kingusinnerusukkut oqallinnissaq aalajangiinissarlu sapinngisamik annertunerpaamik paasissutissanik tunngaveqartumik ingerlanneqarsinnaaqqullugu.

Tamanna tunngavigalugu allannguutissatut siunnersuummik imaattumik ataatsimiititaliaq saqqummiussissaaq:

Aalisarnermi raajat qaleruaannit kitosanimik tunisassiornermik imminut akilersinnaasumik nunatsinni pilersitsinissamut tunngavissaqarnersoq pillugu misissuinermik Naalackersuisut kingusinnerpaamik UKA2017-imi saqqummiusseqqullugit peqquneqarnissaannik Inatsisartut aalajangiiffigisassaattut siunnersuut.

Tassunga ilanngullugu ataatsimiititaliaq isumaqarpoq allannguutissatut siunnersuut naaperiaaffiusoq, tamatumani illuatungaaticut misissuinissamik kissaat aalajangiusermaneqartoq illuatungaaticullu siullermeerinninnermi eqqarsarnartut taaneqartut malinniarnearlutik. Taamaalilluni allannguutissatut siunnersuut naapertorlugu kitosanimik tunisassiornermik imminut akilersinnaasumik pilersitsinissamut tunngavissat Naalackersuisunit qulaajarneqassapput, tamannalu tunngavigalugu ingerlatseqatigeeriaatsit assigiinngitsut piukkunnassusiat kingornagut naliliiffigineqarsinnaavoq.

Siunnersuutip aningaasaqarnikkut kingunerisassai

Siunnersuutip aningaasaqarnikkut kingunerisassai 500.000 kr.-inut tagginneqarput, tamatumalu qularinissaanut Naalackersuisut tunngavissaqarsimangillat.

Ataatsimiititaliaq allannguutissatut siunnersuutaa misissuinerup annertussusianut annertuumik allannguissanngitsoq ilimagineqarpoq, taamaattumillu aningaasaqarnikkut kingunerisassat pisumi matumani aamma 500.000 kr.-inut tagginneqarlutik.

Siunnersuut naatsorsuutigingisamik pisortat karsiisa annertunerusumik aningaasartuuteqarnerannik kinguneqassagaluarput aningaasartuutit taakku aningaasaliissutaareersut iluini akilerneqartussaassapput, taamaattoqassappallu suliniutinik allanik tunulliussisoqartariaqassalluni

Paatsuungasoqaqqunagu ataatsimiititaliamit oqaatigineqassaaq siunnersuut allannguutissatulluunniit siunnersuut naatsorsuutigineqanngitsumik pisortat karsiannut annertunerusumik aningaasartuutaasusaaq paasinarsissagaluarpat aningaasartuutit taakku aningaasaliissutaareersut iluini akilerneqarnissaat ataatsimiititaliamit naatsorsuutigineqarmat, taamaattoqassappallu suliniutinik allanik tunulliussisoqartariaqassalluni. Tamanna tunngavigalugu aningaasaqarnikkut kingunerisassanut siuliani nassuiaatit Naalackersuisunit isumaqatigineqarnersut siunnersuutip aappassaaneerneqarnissaa sioqqullugu Naalackersuisunit sukumiisumik isumaliutigineqassasoq ataatsimiititaliamit aamma kaammattuutigineqassaaq.

Ataatsimiititaliap inassuteqaatai

Ataatsimiititaliami amerlanerussuteqartut Siumup Inuit Ataqtigiillu ilaasortaataa Inuussutissarsiornermut Ataatsimiititaliap allannguutissatut siunnersuutaa akuerineqassasoq inassutigaat.

Ataatsimiititaliami ikinnerussuteqartup Demokraatit ilaasortaataata matuma kinguliani allasimasunik oqaaseqaateqarluni siunnersuut allannguutissatullu siunnersuut itigartinneqassasut inassutigaa.

Aningaasarsiornermut ilisimatuut quisaarlutik oqartarput aqqusinermi aningaasaqanngitsoq taamaassimappammi tiguneqareersimassammata. Kialluunniimmi tamanna naatsorsuutigisinnaavaa. Aqqusinermi sumi immiaaqqap sodavandilluunniit puukuanik kingullermik takuit? Takunngilatit ilaa, katersorneqartarmata utertinneqarlutillu. Aamma taamaappoq sunilluunniit tunisassiulernissarput pillugu politikkikkut isumassarsiat assigiinngitsut eqqarsaatigalugit. Isuma kusanarsimaqippat, arlaat qangali tunisassiulereersimassagaluarpoq.

Soorunami oqartoqarsinnaalluarpoq isummanik kusanartunik ulikkaartoq inuit naluinnagaannik. Niuertut nalinginnaat qanoq ilillutik ilisimassavaat kitosan immaqa iluanaarutigineqarsinnaasoq. Tamanna isumaqatigiissutigisinnaagunarpurput. Kisianni ilumoorpat arlaat kitosanimik tunisassiulersinnaasoq, suliffinnik akileraarutinillu nassataqarsinnaammat, taava soorunami eqqortuliornerussaaq isumassarsiaq tamanut saqqummiunneqarpat. Tamanna pisinnaavoq niuertarfimmik ingerlatsilernissamut kaammattuunikkut. Imaluunniit immikkoortup ilisimatusarfiginerulerneratigut. Aammami

10. november

UKA2016/104

suliniuterpasuit aallartinneqarsinnaapput tunisassiulinngikkaluarluni qularnanngitsumik akiliisinnaajunnaartussamik imaluunniit tapiissuterpasuarunik pisariaqartitsilersussamik.


Paaseqqiinnarparput Kalaallit Nunaata ingerlalluarnissaa tamatta sulissutigigaluarlutigu isumaqatigiissutigisinnaanngilarput qanoq iliussanerluta.

Taama oqaaseqarluni isumaliutissiisummilu allassimasutut paasinnilluni ataatsimiititaliap siunnersuut aappasaaniigassanngortippaa.



Mimi Karlsen sinnerlugu

Siulittaasoq



Justus Hansen


Siulittaasup tullia



Vivian Motzfeldt



Nikolaj Jeremiassen



Kelly Berthelsen